

ՕՐԱԿԱՆ ԱՂՕԹՔ ԵՐԻՏԱՍԱՐԴՆԵՐՈՒ

Տէ՛ր Աստուած իմ, հզօր եւ գթած, դուն՝ որ քու անսահման սիրովդ զիս ոչինչէն ստեղծեցիր քու անհիմանալի պատկերովդ, եւ բարի պարգեւներովդ կը հոգաս իմ բոլոր պէտքերս. ամբողջ սրտով շնորհակալութիւն կը յայտնեմ քեզի՝ ամէն բանի համար, որ տուիր ինծի ծննդեանս օրէն մինչեւ այսօր: Բայց որովհետեւ մարդկային յանցանքներուն բերումով՝ ապականած, տկար, եւ սխալական բնութիւն մը ունիմ, կ'աղաչե՛մ, ինծի քու շնորհքդ եւ իմաստութի՛ւնդ տուր, եւ քու զօրութիւնդ օգնական դարձուր ինծի, որպէսզի կարենամ միշտ քու պատուիրաններուդ փրկակար շաւիղներուն մէջ քալել, եւ համակերպիմ քու կամքիդ եւ Օրէնքիդ, որպէսզի գերծ մնամ հոգիի եւ մարմնի բոլոր վտանգներէն ու փորձանքներէն, հեռու մնամ բոլոր անմիտ սխալներէն, յամառութեան մոլութենէն, անկարգ ցանկութիւններէն եւ սեփական քմահաճոյքներէ:

Դրոշմէ՛ հոգիս մէջ՝ քու երկիւղդ, որպէսզի մաքրութեամբ եւ արդարութեամբ ապրիմ, միշտ քե՛զ ունենալով մտքիս մէջ: Իմ կամքս յօժար դարձուր բարիին եւ քու կամքիդ, դո՛ւն ուղղէ իմ խօսքերս, որպէսզի միշտ վայելուչը ընտրեմ: Իմ տկար անձս մի՛ մատներ այս աշխարհի փորձանքներուն ու տագնապներուն, որպէսզի չըլլա՛յ որ շեղիմ քու խօսքդ եւ բարի շաւիղէն:

Իմ սրտիս մէջ բողբոջէ եւ աճեցուր բոլոր առաքինութեանց սերմերը, որպէսզի անոնցմով ապրիմ իմ ամբողջ կեանքս: Շնորհէ՛ որ միշտ խոնարհ ըլլամ, հեզ եւ համեստ՝ վարքով, բարի եւ մաքուր՝ խորհուրդներով, խօսքով ու գործով, ճշմարտախօս ըլլամ եւ ուրիշին չվնասեմ իմ խօսքերովս, հաւատարիմ եւ ժրջան ըլլամ պարտականութիւններուն կատարումին եւ մանաւանդ այն դերին մէջ, որ դուն տուիր ինծի: Թող արդար, բարեմիտ, իրաւունքը սիրող եւ ողորմած ըլլամ. իմ բոլոր գործերուս մէջ եւ ընկերներուս հանդէպ իմ արարքներուս մէջ. մեծարող եւ հնազանդ ըլլամ ճնողներուս եւ մեծերուս, բարի, քաղցր եւ սիրալիր՝ բոլոր մարդոց հանդէպ, եւ պատրաստ ըլլամ մարդոց ընելու այն՝ ինչ որ պիտի ուզեմ որ ուրիշները ընեն ինծի:

Քու անհուն խնամքովդ՝ դուն հոգա իմ հոգեւոր ու մարմնաւոր պէտքերս, եւ այնպէս ըրէ՛ որ ամէն բանի մէջ քեզի՛ յուսամ եւ ապաւինիմ: Թող տուր որ միշտ շնորհակալութիւն յայտնեմ ինծի տուած բոլոր պարգեւներուդ համար, եւ գոհունակ սրտով բաւարարուիմ իմ վիճակովս ու պայմաններովս:

Հեռո՛ւ պահէ զիս ծուլութենէ եւ պարապութենէ: Փրկէ՛ զիս չար ընկերներէ, չար օրինակներէ, եւ բոլոր վտանգներէն ու փորձութիւններէն: Եւ ընդունէ՛ հօրս եւ մօրս, եղբայրներուս եւ քոյրերուս, ամբողջ ընտանիքիս եւ բարեկամներուս, ինչպէս նաեւ բոլոր մարդոց համար իմ խնդրանքս. բոլորն ալ յիշէ՛ քու սիրոյդ մէջ, եւ բոլորին ալ առատօրէն տո՛ւր քու բարի պարգեւներդ, թէ՛ հոս եւ թէ՛ յաւիտենական կեանքի մէջ: Որովհետեւ քո՛ւկդ եմ փառքը, պատիւն ու զօրութիւնը յաւիտեանս յաւիտենից: Ամէն: